

## 26-боб. Силаи раҳм



16:10 / 14.02.2019 1903

49. Абу Айюб Ансорийдан ривоят қилинади:

**«Бир аъробий Набий соллаллоҳу алайҳи васалламнинг йўлларини тўсиб чиқиб:**

**«Менга жаннатга яқинлаштирадиган ва дўзахдан узоқлаштирадиган амалнинг хабарини беринг», деди.**

**«Аллоҳга ибодат қиласан. Унга ҳеч нарсани ширк келтирмайсан. Намозни адо қиласан. Закотни берасан. Силаи раҳм қиласан», дедилар».**

Шарҳ: Расулуллоҳ соллаллоҳу алайҳи васаллам йўлда уловларига миниб борар эдилар. Бир киши йўлни тўсиб чиқиб, у зотнинг уловлари жиловидан ушлаб, тўхтатди ва юқоридаги саволни берди.

Бу ғалати иш эди. Одатда кишилар Расулуллоҳ соллаллоҳу алайҳи васаллам билан бундай муомала қилишмас эди. Агар саволлари бўлса, бошқача вазиятда беришарди. Аммо бу одам ғайриоддий тасарруф қилди.

Бошқа бир ривоятда айтилишича: «Шунда у ердаги қавм: «Унга нима бўлди? Унга нима бўлди?» дейишди».

Унга нима бўлди? Нима учун Расууллоҳ соллаллоҳу алайҳи васалламнинг йўлларини тўсиб чиқади?

Унга нима бўлди? Нима учун Набий соллаллоҳу алайҳи васалламнинг уловлари жиловидан тутади?

Унга нима бўлди? Нима учун бундай катта саволни сўрайди?

Аммо Расууллоҳ соллаллоҳу алайҳи васаллам ҳалиги кишининг қилмишидан ҳам, саволидан ҳам ажабланмадилар. Ўзларини камтарона тутдилар ва сўровчининг саволига бирдан жавоб бердилар.

### **«Аллоҳга ибодат қиласан».**

«Ибодат», умуман олганда, ғойибдаги нафни талаб қилиш учун амалга оширилган ҳар бир ишдир. Бунда наф охират учун бўладими ёки дунё учун бўладими, барибир. Шунингдек, иккиси учун баробар бўлиши ҳам мумкин.

Агар амал Аллоҳнинг амри асосида бўлса, гарчи сиртдан бошқанинг хурмати бўлиб кўринса ҳам, у Аллоҳга ибодат деб аталади. Ҳадисда мана шу ҳақда гап кетяпти. Мисол учун, ота-онанинг хурмати сиртдан уларни улуғлаш бўлиб кўринса ҳам, Аллоҳнинг амрига биноан бўлаётгани учун, У Зотга ибодат ҳисобланади. Каъбаи Муъаззамани тавоғ қилиш уни хурматлаш бўлиб кўринса ҳам, Аллоҳнинг амрига биноан бўлаётгани учун, У Зотга ибодат ҳисобланади.

Агар амал шариатда бўлмаса ва оддий йўл билан амалга оширилаётган бўлса, унда итоат, хузуъ ва муҳаббат бўлса ҳам, ибодат ҳисобланмайди. Бунга эрига муҳаббат қўйиб, унга итоатда бўлган аёлнинг амалини мисол келтириш мумкин. Шу сабабдан ҳар бир ишни қилганда ниятнинг ва уни амалга оширишнинг тўғри бўлишига, ибодат даражасига кўтарилишига уриниш керак. Акс ҳолда бу амалга ширк аралашиб қолиши хавфи ҳам бор.

### **«Унга ҳеч нарсани ширк келтирмайсан».**

Ширк ақийдада ҳам, амалда ҳам бўлиши мумкин. Бу икки турдаги ширкдан ҳам эҳтиёт бўлиш керак.

### **«Намозни адo қиласан».**

Яъни тўла-тўқис адo этасан. Уни адo этишда ҳеч қандай нуқсон ва дангасаликка йўл қўймайсан.

## **«Закотни берасан».**

Бермай қўймайсан. Бу молиявий ибодат бўлиб, Исломнинг беш рукнидан биридир.

## **«Силаи раҳм қиласан».**

Бу ҳадиси шарифда силаи раҳм қилиш – қариндошлиқ алоқаларини яхшилаш иймон, намоз ва закот каби Ислом рукнлари билан бир даражага қўйилмоқда.

Бу амал кишини жаннатга киритадиган ва дўзахдан қутқарадиган амаллар рўйхатига қўшилмоқда. Силаи раҳм қанчалар аҳамиятли амал эканини шундан ҳам тушуниб олсак бўлаверади.

*50. Абу Ҳурайрадан ривоят қилинади:*

**«Расулуллоҳ соллаллоҳу алайҳи васаллам шундай дедилар:**

**«Аллоҳ азза ва жалла маҳлуқотларни халқ қилди. Ундан фориғ бўлгач, раҳм ўрнидан турди.**

**«Нима гап?» деди У Зот.**

**«Бу – қариндошлиқ узилишидан Сенинг паноҳингга қочганнинг мақомидир», деди.**

**«Сени боғлаганни боғлаб, узганни узишимга рози бўлмайсанми?» деди У Зот.**

**«Ҳа! Эй Роббим!» деди у.**

**«Ана шу сенга бўлсин!» деди У Зот».**

**Сўнгра Абу Ҳурайра: «Агар истасангиз, «Эҳтимол, (иймондан) юз ўгирсангиз, ер юзида фасод қилиб, қариндошлиқ ришталарини узарсиз?!»ни ўқинг», деди».**

**Шарҳ:** Мазкур ҳадиси шарифдан қариндошлиқ ҳаққи қанчалар улуғ эканини билиб оламиз. Бу ҳақ Аллоҳ таоло Ўз маҳлуқотларини яратиб бўлиши билан событ бўлган ҳақлардан экан.

Аллоҳ таоло Ўзининг холиқлик сифати или барча маҳлуқотларни яратган чоғдаёқ раҳм дарҳол ўрнидан туриб, қариндошлиқ алоқалари

кесилишидан паноҳ сўраган экан. Ана шунда Аллоҳ таоло қариндошлиқ алоқасини боғлаганлар билан алоқа боғлашни ва уни кесганлардан алоқасини кесишни ваъда қилиб, уни рози этган экан.

Аллоҳ таолонинг ваъдаси ҳақ эканига заррача шубҳа йўқ. Шундай экан, ҳар бир мўмин-мусулмон банда қариндошлиқ алоқасини яхшилаб боғлаб боришга ҳаракат қилиши лозим.

Ҳадисни ривоят қилувчи улуғ саҳобий Абу Ҳурайра розияллоҳу анҳу бу ҳадис маъносининг тасдиғи Қуръони Каримда ҳам борлигини таъкидлаб, Муҳаммад сурасидаги 22-оятни ўқиб кўришни тавсия қилган эканлар.

«Эҳтимол, (иимондан) юз ўгирсангиз, ер юзида фасод қилиб, қариндошлиқ ришталарини узарсиз?!»

Бу оятда иимондан юз ўгириб, жоҳилиятга қайтишдан келадиган бу дунёдаги заарлар эслатилмоқда.

Аввало, бу иш ер юзида фасод қилиш бўлади. Чунки иимонсиз кишилардан доимо мана шундай ёмонлик келиб чиқсан.

Шу билан бирга, иимондан қайтганлар ўз қариндош-уруғлари, ёру дўстларидан қардошлиқ ришталарини узадилар. Бу ҳам улкан зарар ҳисобланади.